

四庫全書

集部

欽定四庫全書

梁谿集卷三十一

宋 李綱 撰

詩二十七

甲寅秋至乙卯已後作四十六首

次韻劉仲高提刑喜雨

再賦兩篇

全真復以詩來走筆答之

奉寄李泰發端明

汪廷俊見示喜雨和篇次韻答之

題劉仲高所藏文與可墨竹

諸公復以喜雨詩來勉強賦一篇

諸季邀德久申伯同遊靈源

讀莊子六絕

送劉仲高提刑赴行朝

送鄒德久還大柘舊隱

送張柔直赴岳州

庭中醑醺盛開二甥以詩來和其韻

張甥賦碧桃次其韻 送錢申伯如邵武

小圃初成秦楚材有詩次韻

桂老以拄杖旄牛拂見遺報以二絕

次韻李似宗見示小圃之作二首

十二詠十二首 呂元直退老堂兩章

送張子固大資政赴召命

送秦楚材還永嘉

陳國佐左司寄示天台山圖以兩絕報之

丹霞本老見示拂子并頌次韻

劉仲高提刑見示喜雨佳作次韻和之奉呈全真

安撫資政

精禱龍淵默感通寸誠端可格蒼穹驅除旱暵千峯翠
灑濯焦枯百穀豐可喜盍親尊酒淥成霖未放海雲紅
清涼更覺山川勝閉戶空慙學寓公

七月六日通夕大雨闔境告足豐年之慶枕上用

前韻再賦兩篇呈全真諸公

絳闕清都一念通沛然甘澤瀉層穹天心會與人心合
國事尤須歲事豐秋水陡添江上碧朝陽却照棟間紅
精誠自可驅雷雨安用區區致八公

千里溝塍派脉通挽回樂歲賴高穹風雷借助不勞力
粳稻有期成屢豐枕上醉魂清夢想枝頭嘉果濕猶紅
旅居又喜逢穰熟地主端疑是鄭公

東漢鄭弘為淮陰
太守隨車致雨白

鹿挾
穀

張全真復以詩來走筆答之

良牧齋祈意輒通淒然似欲變秋穹涼生枕簟精神健
爽致江山氣象豐編簡卷舒初有味丹爐進退漸看紅
蓂收又整清商御自哂何年拜木公

漢謠揖金母拜木公謂東王公也

奉寄李泰發端明

一別東吳不記年飽經憂患各林泉知公置酒常高會
顧我杜門惟熟眠無分去為湯餅客有緣來作荔枝仙
越溪閩嶺無多地步月看雲只黯然

汪廷俊見示喜雨和篇次韻答之二首

一氣潛升處處通誠心初不間隆穹乍欣草木回枯槁
更喜梁盛備潔豐宿霧遊雲朝尚合斷霞殘照晚偏紅
陽舒陰慘無遐邇造物從來任至公

憫旱遙將精意通秋霖霽霈仰旻穹山川增煥家家好
黍稷方華物物豐得句自應髭變白舉觴何惜頰潮紅

他時倘會風雲便肯倒長瓢學衛公

小說李衛公未遇
時常代龍行雨每

下瓢中一滴水輒尺餘過故鄉
憫其久旱倒瓢傾之遂成漂溺

題劉仲高提刑所藏文與可墨竹

蕭郎畫竹稱逼真與可所作尤絕倫不將丹青借粉飾
直把寶墨傳精神渭川萬箇在胷次援毫戲掃如烟雲
眼前先見欲畫者免起鶻落氣益振椎枯偃仰盡變態
筆力幹轉風霆春平生知作幾千幅得心應手老斲輪
當時誰是識畫者謫仙東坡蓋其人老坡亦善作此畫
意雖已到法未親是中妙處不傳授但得木石枯鱗皴
自從兵火喪亂後錦囊玉軸隨埃塵公於何處得此本
四枝墨色猶鮮新風梢雨葉間濃淡紛披屈折節脉勻

置之座右滌炎暑颯颯更覺秋聲聞子猷會見定絕倒
安用日事栽培勤只今與可骨已朽妙蹟散落此幸存
願公秘惜勿輕示更築小堂名墨君

與可每畫竹不令東坡見恐得其法也坡嘗問以
已畫何如與可曰公所畫棘針法耳坡聞之輒大
進

諸公復以喜雨詩來勉強再賦一篇見鄙意

聖君憂國物情通良牧精祈動上穹塞北干戈雖未定

江南未稼自多豐
阿香推轂驚雷遠
玉女投壺笑電紅
幽贊中興萬靈集
願將人績屬羣公

諸季邀德久
申伯同遊鼓山靈源洞
僕以病不果
往賦詩見意

靈源韞秀異
傑出閩粵間
神功謝鵠鑿妙境森回環
曲磴下窈窕高巖上孱顏
松蘿互蔭翳正暑生清寒
路轉人寂寂泉飛澗潺潺
乘高望雲海天末波濤翻
偉哉宇宙中有此氣象寬
諸子雅好遊蠟屐履山樊
佳客來自

遠復共一日歡而我抱衰疾屏居方杜闕豈不樂山水
宴坐心不闌神遊八極表目寓無髣髴塊視衆嶽小杯
看五湖慳矧茲几案物安用勞躋攀登臨務得雋無乃
見一斑作詩調諸子醉語不可刪秋風動林壑凍雨洗
塵寰新涼至萬里濃翠浮千山白雲出何心飛鳥倦自
還興盡盍遄返勝遊宜勿殫

讀莊子六絕句

漆園仙吏已賓霄浩蕩奇言久寂寥鵬鷖何須迭相笑

斯遊安往不逍遙

世間物論最難齊有萬初從一氣吹若會此心平等法
天淵元自絕高卑

養生有主衛生經神守全時豈廢形遊刃有餘刀不挫
解牛湏是學庖丁

濠上觀魚適意時從容魚樂獨心知何須更問魚非我
能見魚遊復是誰

寧作泥塗曳尾龜難堪芻豢廟中犧從來一臂重天下

肯以此身輕用為

詆欺儒墨每云云
芻狗詩書跡已陳
泯絕是非歸道妙
掃除糠粃見天真

送劉仲高提刑受代赴行朝

繡衣將命七閩中
攬轡褰幃邁古風
懷抱坦然推厚德
平反多處贖陰功
却持漢節朝天陛
未許甌民借寇公

簪筆行趨青瑣闥
攜家去指水晶宮

將泊家吳興郡故云

風吹烟

浪萼鱸熟日照霜
林橘柚紅若到東
吳見知舊為言多

病一哀翁

送鄒德久還大柘舊隱三十韻

抱病卧雲海杜闕誰與遊鄒子惠過我命駕無停輶但
思一會面不願萬戶侯故人相許心拔俗今焉儔觸熱
涉長道始識甌閩州叩門泉石邊僮僕驚髭虬怪我齒
髮衰志氣非昔侔豈知數年來患難如戈矛收悲且歡
欣身健餘何求情話豁懷抱高辭紹軻丘遠尋雲間寺
屢泛江上舟同擘荔枝紅坐見菊花秋告我欲過返歸

袖風颼颼投老不禁別聊茲小淹留置酒古道場大白
相獻酬短日忽西匿輕雲靄而浮露下松桂枝月轉西
南樓慙勤渭城唱達旦增離愁念子韞器業學博仕未
優至寶委路傍誰能辨琳球世事方多難英俊宜旁搜
何人有高識薦此窮馬周丈夫重氣槩出處非身謀歸
然棟梁材回首須萬牛玄豹且深隱駉驥將見收嗟我
蒲柳姿雅稱山林幽平生七不堪豈獨三宜休國恩竟
未報負此終身羞行矣勉著鞭俟時攄壯猷他年鐘鼎

勲在子吾何憂

送張柔直赴岳州

荆楚通南國巴陵據上游江湖作襟帶民物會車舟
喪亂經多難荒涼但一丘高臨洞庭野無復岳陽樓
帝念蘇疲俗恩頒起故侯光華剖符竹輯睦擁貔
貅魯肅規模在陶公政績優遠師前哲訓力贊中興
謀羣盜何難縛侵疆儻可收往分十里寄為解九重
憂我已甘衰病君方茂壯猷三年共幽討此日動離
愁世事經綸急淵

衷寤寐求着鞭先祖逖悟主繼千秋聞外資奇畫樽前
失勝流瀟湘有回鴈莫遣信沉浮

庭中酴醾盛開二甥以詩來戲和其韻

栽培初不棄葑菲桃李無言下自蹊試營小圃供幽奇
野趣獨與閑相宜邇來落葉子滿枝新花璨發歸酴醾
濛濛烟雨濕冰姿湯泉乍洗溫柔肌玉人胡為在軒墀
態濃意遠芬蘭芝月華萬里來清輝照耀光彩通屏帷
青雲宛轉蟠素螭高架上與飛薨齊客來花下同圍碁

對花不怕輸吟詩帝鄉富貴未可幾淵明之語真良規
一杯相屬慎勿辭我方鋪糟啜其醕醉中不省今何時
曾次洞達元無疵山林正好相娛嬉朝廷漸有中興期
羲和鞭日不肯遲海水清淺蓬萊池飛花雪落白玉巵
起舞鶴氅風前披

張甥賦碧桃次其韻

未許濃華獨占春故將淺碧鬪清新水肌綽約疑姑射
玉質丰容似太真不與天香緣底事祇應國色已無倫

慇勤池上親培植從此芬芳冠七閩

送錢申伯如邵武

錢郎與世苦不諧
冒次徒抱經綸才行年五十猶未試
蟠螫雖久愆風雷掃除習氣趣空寂
華藏重重恣遊歷
世間幻妄此道真未必亨通勝窮阨
我方卧病南海濱
喜君襟抱時相親
胡為乘興有所適
使我悵望歸飛雲
兵戈格鬪何時息
田園將蕪歸未得
同是天涯流落人
此心炯炯君應識
閩山六月丹荔枝
火齊堆盤有一卮

願言及此復過我歲晚勿負滄海期醉鄉我已成真隱
君亦逃禪學蘇晉樂天不醉即談禪此外悠悠真須忍
小圃初成秦楚材直閣有詩因次其韻二首

僧坊暫寓白雲邊古木荒溪濕暝烟試葺池臺學愚谷
不妨風物似斜川邀賓深愧裴公野淪茗空懷陸子泉
塵世悠悠盡虛幻且將身健鬪尊前

屏跡山林得放懷檻花欄藥手親栽會心魚鳥自相近
乘興朋遊時自來半世乾忙嗟白髮四方多難使心哀

巖隈水曲翛然處老木輪囷愧不才

茅齋成乾元珪老以拄杖旄牛拂見遺成二絕句

以報之

橫挑世界鴻毛舉平打虛空冰片消今日拈來居士手
穿雲渡水且逍遙

不取非廉取不貪玉裝麈尾謾毵毵年來居士無言說
立起從教作麼參

次韻李似宗見示小圃之作二首

山林自與性相宜卜築何須物物奇
旋剪荆榛開小徑自移松菊趁佳時
雲生北嶺難持寄月出東山有所思
歲晚龐翁更多病攜家真赴鹿門期

竹影桐陰夏日長
水花晚色淨林塘
招邀風月成三友
邂逅賓朋共一觴
閑把琴書聊自樂
靜看蜂蝶為誰忙
年來百念皆灰冷
願學螺川雲水鄉

十二詠

雙蓮閣

並蒂芙蓉出綠波
靚粧鸞鑑照雙娥
風清月曉微開處
無那幽人獨見何

夢室

誰把人間比夢間
本來夢覺兩閒閒
清風一枕北窗下
遊徧江南多少山

藥圃

病翁餌藥欲扶衰
自斲霜根種種移
端為出山成小草
白雲深處養青芝

橘亭

雪避繁華葉勝雲野亭秋後露苞新橘中不減商山樂
留與昂藏四老人

竹亭

檻外新篁玉笋抽和烟滴露碧先浮此君一日難相捨
疑我前身是子猷

荔枝亭

平生最賞荔枝名手植芳根傍草亭嘉木亦知人意重

著花不待一周星

桂亭

團團雙桂拂茅齊
虛幌疎櫺盡日開
會待秋高風露下
清香飄泛月中來

蘭室

畫道幽蘭是國香
沐湯紉佩慕芬芳
何如邂逅同心士
一吐胸中氣味長

花塢

收拾羣英賴化工
嫣然紅紫自成叢
四時不絕芳菲意
誰謂春歸閬苑中

圭沼

旋鑿幽池象玉圭
蓮開紅素兩相輝
年來居士心離垢
天女從教試染衣

磬塘

喬木森森借綠陰
曲塘波影漾疎林
龜魚不用愁清淺
藻荇菰蒲隱映深

菖蒲澗

寸根九節結孤芳青劍凌波日日長
幸有仙方辨真贗
醫師休更進菖陽

呂元直得書天台郭外治園林作
退老堂求詩為賦兩章

獵得飛熊自渭濱釣璜賜履定前身
功高浴日千山曉
力拒回天萬國春
輒輟巖廊調鼎手來為林壑採芝人
片帆雲海無多地歎息何緣廁末賓

周遭疊嶂俯清流卜築園林事事幽春日鶯花隨袞繡
秋來松菊照林丘謝公終為蒼生起裴相聊成綠野謀
聖主思賢方仄席未應長伴赤松遊

送張子固大資政赴召命二首

海邦臨撫忽頻年愷悌宜民德化宣久戀闕庭心自往
乍歸帷幄席應前鹽梅好去陪三事風月還須記九仙
聖主從容問幽仄為陳衰病老林泉

屏跡山林養病身數迂旌旆訪幽人追酬雅韻篇章富

共醉芳醪意氣親
顧我老為滄海客
羨公去作紫霄賓
經綸蚤動中興業
亦欲歸居浙水濱

送秦楚材還永嘉

海上從容慰所思
相逢已恨十年遲
未登臺省陪羣彥
且向江湖把一麾
顧我留為鷗鳥伴
羨君歸赴鵲鳩期
樽前聽徹陽關唱
明月依然照別離

陳國佐左司寄示天台山圖以絕句兩章報之

往年曾讀興公賦
頗愛天台擅美名
數幅生綃傳貌得

恍如陸地到蓬瀛

應真飛錫游行處峭壁危峯跨石橋便欲遠尋方廣寺
却疑圖上有嘉招

丹霞本老見示拂子并頌次韻

鈍根不會世間機且作東山老住持有箇旒牛閑拂子
用時由我不由伊

梁谿集卷三十一

欽定四庫全書

集部

梁谿集卷三十二至
四

詳校官庶吉士_臣張溥

侍讀_臣孫球覆勘

總校官知縣_臣楊懋珩

校對官中書_臣潘奕雋

謄錄監生_臣李天相

欽定四庫全書

梁谿集卷三十二

宋 李綱 撰

詩二十八

自丙辰歲至豫章及戊午歲歸自豫章後作三十七首挽歌詞及哭祭二十首

贈羅偉政奉議

次韻李西美舍人見寄二首

次韻林茂南觀閬水戰之作

南昌樓秋望

冬至日雪

再和趙正之觀水戰三首

正之復次韻作六章報之

殘臘雪再作二首 再次前韻二首

趙都漕出示魯直少游所書梅詩次韻

呂元直移鎮臨安 次韻趙正之寵和

送趙正之之官閩中

次韻鄭顧道侍郎用師字韻見贈

次韻徐運使仲冬大閱

次韻折仲古食荔子感懷

遊山拙句

次韻廷俊紀藥圃小集見贈之作

冬日來觀鼓山新閣

遊大乘三首

舅甥會兩章

次李泰發韻二首送仲輔提刑弟還浙東

挽歌詞及哭祭詩

二十首

楊夫人挽章二首

唐植甫左司挽詞二首

哭宗留守汝霖

致享張修撰墓下

哭吳元中丞相二首 哭許崧老丞相二首

許子大龍圖挽詩二首

張次東中奉挽詞三首

祭張柔直龍圖四絕句

贈羅偉政奉議

契濶踰年若泛萍一樽還此共江城
蘭舟桂楫肯相訪
南浦西山無限情
顧我已甘華髮老
羨君猶戲綵衣輕
秋堂夜飲他年話
莫忘棊聲雜雨聲

次韻李西美舍人見寄二首

鐵騎長驅犯帝閭，濫陪國論敢謀身。
十年不得關河信，四海猶飛戰伐塵。
駕馭英雄歸睿主，扶持宗社賴元臣。
自慚老病無長策，徒奉藩條牧細民。

幾年離索渴微言，敢意高車過我門。
暫解軒中徐孺榻，謾開坐上孔融樽。
羨君感慨猶能飲，顧我哀遲已抱孫。
杞梓梗楠委崖谷，上章端欲叩天閭。

次韻林茂南參謀觀閬水戰之作

習戰樓船章水濱機輪運轉若無人旌麾耀日驚飛鷺
金鼓翻波躍錦鱗四坐縱觀聊舉白一陽潛動欲回春
羽書正報淮淝捷想見臚傳設九賓

南昌樓秋望

兵火凋殘今幾秋江山依舊繞層樓飛雲卷雨不窮態
明月清風無限愁老子平生興不淺昔人何在水空流
落霞孤鶩齊飛處望斷楚天盡頭

冬至日雪二首

銀河誰挽落層空散作瓊蕤六出同和氣已隨陽氣至
人心自與帝心通魯臺不用書雲物楚俗由來驗歲功
多幸豐年又相繼從今臥治聽哀翁

端木飛花片片勻天風不動玉成塵葭灰有意迎新律
梅蘂多情漏早春更覺西山饒爽氣不妨東閣會嘉賓
十年不見渾如夢休怪兒童笑語頻

再和趙正之都運觀水戰三首

戈船列陣楚江濱世事何嘗不在人鷁首衝風開雪浪

甲光向日動金鱗
烟霄易覺壺中晚
談笑潛回席上春
更辱佳篇與褒飾
主人深有愧西賓

使節來從河水濱
天心圖舊慰斯人
肅將宸指蠲民瘼
力挽恩波活轍鱗
北伐正須猷克壯
中興方與物為春
外臺豈久留英躅
佇見觀光利用賓

抱病深棲雲海濱
誤恩起廢愧陳人
飛騰固乏搏風駟
游泳長思縱壑鱗
一局銷磨垂老日
三杯搖蕩滿懷春
何當詔許歸田野
會有漁樵作上賓

正之復次前韻作四篇見示是日適登城樓以望
江山且閱捷報因賦六章以報之

帝遣宗英使楚濱漕臺元自得詩人從橫錦繡花生舌
飛動龍蛇墨起鱗心拱北宸恩露渥笑回南浦淥波春
不須過作飛芻計早晚追陪紫府賓

黠寇狂謀犯泗濱脅從太半是吾人且將戈戟殲蛇豕
會把衣裳易介鱗河洛至今思帝德雲龍行見會王春
漢官儀物都如舊混一車書萬國賓

晉敗苻秦淝水濱謝公祇用八千人飛騰貔虎生修翼
屠剪鯨鯢膾硬鱗否運既傾終反秦寒威已振却成春
吾皇盛德超千古接士端如見大賓

餘艘搖曳大江濱龜手從來笑越人會使風檣如陣馬
何妨鷁首著龍鱗已欣淮北兵戈捷且醉江南麴米春
元直德翁忘爾汝孰為東道孰為賓

城樓縹緲俯漳濱景物依然念昔人雲出西山天欲雪
風來南浦水生鱗四圍氣象朝朝好一點陽和處處春

日暮短蓬輕槳急雙魚應已付溪賓

伊昔端居寂寞濱每於騷雅愛其人長篇賸得爛斑錦
短句兼收細碎鱗指下粗能知越操郢中那敢和陽春
願藏大手無輕露寸膽于今已自賓

殘臘雪再作二首

朔風三日散輕埃珠藥瓊花一夜開灝氣遠從雲表下
清聲初自竹間來未論上瑞呈三白且助元功澤九垓
向晚城樓聊寓目西山千疊玉崔嵬

縈回作舞下烟霄滿地光銚混凸凹虛幌夜寒疑月彩
疎林曉粲誤梅梢遠懷戴隱終須訪高擁袁門未易敲
好是碧天雲散後銀蟾皎潔兩相交

再次前韻

太清真境絕氛埃十二瑤臺面面開戰退玉龍鱗甲冷
導迎仙鶴羽儀來祥編已慶占盈尺和氣行欣浹九垓
須信天公工幻戲晴山依舊翠崔嵬

霏霏玉屑灑層霄皓色輕盈已覆凹留客徑須開綠蟻

探春何處認青梢
堦庭充積無庸掃
松竹歌摧尚惜敲
深愧主人修具薄
嘉賓徒使獻酬交

趙都漕出示魯直少游所書梅詩次韻

冰散憑陵羣木槁
只有梅花欺不倒
籬邊野外忽嫣然
暗香解作幽人惱
化工著意為尤物
故遣孤芳得春早
道人寫照三昧手
不假丹青更妍好
詩家也是可憐人
落筆雲烟隨意掃
遂令淡墨勝鉛華
紙上一枝長不老
庭中幾樹正垂垂
忍看飄零委煙草
會須痛飲對繁華

細把根源問蒼昊

呂元直移鎮臨安入覲行闕余方以衰病請門有
卜居浙東之意願為根老堂之游作詩寄之

詔起三湘老獵師和羹舊手帝深知戎車北伐資長策
袞繡東歸有去思謾作天台休老計正當黃閣立賢時
主人方為蒼生急願借新堂醉一卮

趙正之寵貺和篇褒與過厚適傳新命念睽違之
有日預深悵然輒次其韻

七言八法定誰師妙處工夫只自知南浦西山久同賞
清風明月更相思瓌材卓犖承恩日衰病侵尋念去時
垂老相看重言別莫辭瀲灩十分卮

送趙正之判宗寶學之官閩中

神明之胄慶所鍾稟毓不與常人同漢高子孫盡隆準
唐室賢輔多華宗本朝功德追前古振振宗姓敦儒風
君家奕世擅英譽繼持從橐聲光崇向來仗節使關陝
風績不減褰帷公自從國步暫艱危低眉信命隨飄蓬

十年流落困羈旅一日賜對明光宮御前奉命作大字
揮毫落紙蟠虬龍豈惟筆扛百斛鼎固已氣吐千丈虹
上流重地方用武貌貅十萬屯元戎輟從禁近付飛輓
木牛流馬慙無功國家敦睦急先務改授欲使歸磨礪
捨煩就簡愜雅志祇恐漕運難追蹤閩山中夏荔枝熟
火齊磊落堆盤紅憑空跨壑千佛寺金碧照耀烟霞中
登臨多暇飫珍品豈比朱墨相填叢帝心簡在方仄席
鋒車迅召行登庸嗟予憂志苦多病齒搖髮脫真衰翁

誤恩分閭愧無補豈有惠澤漸兵農乞身屢矣未蒙可
坐使澤雉愁樊籠送君南浦慘長別此心已逐歸飛鴻
會當柴車返故隱幅巾杖屨長相從

次韻鄭顧道侍郎用師字韻見贈

昔年班列會京師邂逅相逢只舊知一紀此身渾似夢
中原回首不堪思乍欣旌旆來臨日共喜江山適意時
感慨不須論舊事且將強健對芳卮

中冬教閱兵將運使徐顯謨貺惠佳什降歎之餘

因次其韻以答厚意且簡同會諸公

伐鼓縱金閔五兵霜天清曉正崢嶸輕裘自愧叨儒帥
一令安能探舊營獵獵旌麾搖有浪駢駢徒御肅無聲
滿堂賓客皆英俊莫怪陳蕃倒屣迎

次韻折仲古安撫端明食荔子感懷書事之作

卧病閩山強自支嘗珍似與故人期却嗟老眼傷心日
又見輕紅着子時萬事從來皆默定一樽聊復賦新詩
使君不作楞梨看他日逢人舉似為

遊山拙句奉呈珪老并簡諸公

嘉客同遊海上宮，高僧問道得從容。
乍驚暑退靈源洞，最愛庭開大頂峯。

峯舊為閣，所遊師從閣而峯見氣象雄偉。

傑閣初成切星

斗，飛雲時到繞杉松。
我來未盡登臨興，更待秋高灝氣濃。

次韻廷俊紀藥園小集見贈之作

逶迤車馬出郊東，高閣登臨四顧雄。
雨飽共欣秧稻綠，酒酣尤愛荔枝紅。
漫同小隱開三徑，頗傲前賢時一中。

坐上衆賢皆降歎滿浮大白莫如公

冬日來觀鼓山新閣偶成古風三十韻

尋盟訪鼓山風物宛如昨山中有開士彈指成傑閣應
直飛錫來一一得所託翬飛騫棟甍絢爛麗丹雘我
大頂峯孤影入簷角乃知衆教力建立必卓犖却為靈
源遊雲木互參錯巖深松桂香石古苔蘚剥冬溫日清
美景短氣蕭索天然資野逸安用遮翠幕快哉緬登臨
及此小搖落乘高望瀛海南極露垠堦蓬壺在跬步誰

謂仙山邈蒼茫杳靄中萬象恣磅礴迴頭睇中原郡國
半沙漠犬羊污宮殿蛇豕穴城郭疇能挽天河一洗氛
祲惡我生多艱虞久矣哀病作君恩聽言歸養拙侶猿
鶴忽忽歲道盡平子殊不樂幸同二三子杖履徧丘壑
躋攀力尚強談笑心無忤野鹿飽豐甘冥鴻在寥廓翻
思軒冕間何異遭束縛斯遊信清絕妙賞寄寂寞晚來
淒以風遠色秀增岳泠泠鐘磬聲隨月度林薄怒焉感
時心未免如隕籜倘能駕雲螭豈復憂世瘼會當期若

士相與踞龜殼

還自鼓山過鰾溪遊大乘榴花洞瞻禮文殊聖像

漫成三首

一派寒流作小溪松篁深處有叢祠
千年鰾骨專車在百丈靈湫瀑布垂
粳稻豐穰欣歲樂笳簫清咽報神私
更將小雨為滂潤正是農夫播麥時

乞得明時多病身歸來林下養天真
芒鞋竹杖未全老藥竈酒壺隨分春
山寺遞傳鐘磬晚田家收拾稻粱新

試窮溪上榴花洞恐有桃源避世人

布地金沙片片勻深沉院宇閤祇園清涼路半前三語
摩詰城中不二門千種光明瞻瑞相六根清淨為還源
狻猊坐上法王子稽首皈依衆所尊

冬至前六日奉陪舅氏燕集于張甥東齋泰孫侍
坐舅甥四世同會豈易得也舅氏以詩見貺謹
次韻成兩章拜呈并簡季弟二甥同賦

舅甥高會共稱觴四世于今在一堂眉壽康寧由德厚

慶流深遠本源長但將直道師周孔豈有嘉猷助禹湯
提誨勤勤何以報願言殊祉集新陽

人間此會信非常和氣薰然自滿堂競酌芳樽同勸壽

正當愛日欲迎長綵衣誦古如流水

是日泰孫誦詩書萬餘言無一誤者

華髮銜杯若沃湯

坐間舅氏與僕皆為酒所困

乘馬路車何以贈渭

陽元自是王陽

次李泰發韻二首送仲輔提刑弟還浙東

朝路紛紛厭送迎乞歸恩予繡衣榮稍知物外烟霞好

便覺塵中富貴輕飛鳥已能同葉令叱羊何必效初平
坐忘我欲師前躅為過天台訪赤城

謁告來歸若駿奔友于真可裕初晁共傷庭玉先埋土
悵望鵠原增斷魂白髮自嗟臨藥竈一鉞端欲寄空門
浙東耆舊如相問為道哀遲愧主恩

挽歌詞及哭祭詩

楊夫人挽章二首

來嬪初卜鳳和鳴誰謂今聞薤露聲婦道宜傳青史筆

壺儀猶在錦官城承家早慶芝蘭秀主饋空餘蘋藻誠
念舊二卿情意厚可堪孤坐想平生

悼亡何事覺神傷端為音容不可忘舉案素聞敦節操
題橋今見共龍光錦囊屢慶宸恩重丹旌俄嗟蜀道長
髣髴靈遊元未遠無人解致返魂香

唐植甫左司挽詞二首

踐歷高華久巍然譽望崇典章諳故熟翰墨老彌工
亮傳家法清忠邁古風溫溫江玉硯同閔九原中

夙昔欽賢業何知共里閭忘年遇我厚謫宦識公初小
嶺親高論靈齋見異書淒涼真一夢追想涕漣洳

哭宗留守汝霖

宗澤字汝霖浙東人自為小官卓犖不羣能自
立以故屢被罪靖康冬用為磁守值金寇再犯
闕上以康邸奉使道磁澤力挽留不得行再造
之功澤為多同列者忌之譖毀百端斥外不用
余去夏抵行在澤得守襄陽未行與款語忠義

慷慨憤發至流涕力薦於上使進職留守京師
誅姦惡拊善良大得都人之心繕治城塹樓櫓
復完壯屢出兵以挫賊鋒以故能守數表請車
駕宜還闕媚嫉者愈切齒難其代者故得不罷
今聞其疽發背而死殆憂憤使然殊可為天下
惜也詩云人之云亡邦國殄瘁方時危而失此
一人其可哀也矣賦詩以哭之

時危念人傑濟物須材雄尋常齷齪姿詎可收奇功英

英宗夫子邈與古人同抱器實磊落秉心鬱精忠彩纓
仕州縣山立不妄從青松雖未高已足凌蒿蓬涉世多
齟齬失官久龍鍾擢居河朔郡烟塵正昏蒙今上在藩
邸持節使敵中力爭不可往高牙建元戎王室遂再造
廊廟當疇庸同朝共排媚一麾江漢東見我論世故慷
慨淚沾甯薦之守留鑰付以節制隆惠政附疲瘵威聲
懾姦兇金湯治城塹樓櫓欵以崇出師京洛間屢挫巨
寇鋒邦畿千里寧誇說百歲翁抗疏請還闕北伐歸兩

宮辭直志鯁亮天子為動容姦諛更切齒恨未能關弓
乃同歸鄴人感憤殞厥躬皇天不愍遺吾道何其窮驂
騶竟委離冀北羣遂空梁推大厦傾誰與扶穹窿安能
百身贖坐為四海恫人亡國殄瘁天意真懔懔中原氣
蕭瑟灑涕臨西風

致享張文脩撰墓下追惟平生不勝愴然輒成兩
章以叙懷感之意

秋原鬱鬱見佳城尚想音容涕泗橫痛惜山顙與梁壤

愧無玉潤繼水清
喪賢初值龍蛇歲
憂國空餘金石誠
賴有堦庭蘭玉在
芬芳端不墜家聲

勇退風流靄士林
對揚丹扆極規箴
高名雅出漢庭右
遺愛空存南國深
身後淒涼報恩子
生前軒豁濟時心
九原可作如公少
獨立西風淚滿襟

哭吳丞相元中二首

妙年聲譽霽文場
壯歲飛騰青瑣郎
獻納承平欲堯舜
扶持危難冀宣光
賈生曠達仍傷鵬
平仲精忠亦殞荒

自古青蠅能黑白玉華舊事已淒涼

宣和之季靖康初同力同心衛帝居扶轂共升新日月
謫官難守舊田廬孔光溫室不言樹陸贄忠州戒著書
歎息端莊士君子豈隨草木腐丘墟

哭許崧老右丞二首

夫子相知一紀前定交握手自忘年長松老鶴骨格古
粹玉精金操守堅出入三朝昭大節漂流萬里正華顛
皇天不憖遺元老空使蒼生共黯然

多聞直諒復疏通近世交遊少似公蓋代才名同賈誼
平生述作類揚雄筆蹤高古今那有詩調清新老更工
知識年來凋喪盡不堪哀淚落秋風

許子大龍圖挽詞二首

芬芳登桂籍烜赫紹家聲持橐恩輝渥分符政術明優
優方廕仕鬱鬱遽佳城庭戶多蘭玉應無可恨情

接武鴛鴦列交承淮海州平生欽德望避地歎風流樽
俎開幽抱江山共勝遊那知生死隔哀淚浩難收

張次東中奉挽詞三首

賈父褰帷日于公駟馬門十年持使節兩郡擁朱轡無
復功名會空餘氣槩存淒涼九原路楚些與招魂
寓意樽中渌陶然得此生孔融真好客阮籍自忘形議
論千夫屈風流一坐傾傷心將玉樹寂寞閔佳城

南國多奇士如公豈易求才高雖擅譽命阨未封侯故
宅風烟慘新阡松桂幽遙傳一掬淚為灑暮江頭

致奠張柔直知郡龍圖以詩四章哭之書置靈几

以代祭文

一枰兩淺

頃歲寓長樂與君過從必圍棋酌酒薦以荔枝兩淺盤君嘗云此生但得奕一枰荔枝兩

淺足矣

舊相期歎息君今願已違却把荔枝三奠酒數行

哀淚濕深衣

隻鷄斗酒祭夫君尚想平生意氣親痛惜中原未恢復
如何天乃喪斯人

去歲如今會豫章從容談笑共銜觴豈期便作終天訣
尺素開時神內傷

連夕頻頻夢見君依然野鶴

關

淺

世事渾如空際雲

梁谿集卷三十二

欽定四庫全書

梁谿集卷三十三

宋 李綱 撰

表本詔書上

擬撰表本

起居道君太上皇帝表本

起居孝慈淵聖皇帝表本

靖康擬詔書

撫諭河北詔

獎諭徐處仁詔書

起防秋兵詔

募兵出財詔

戒諭姚古詔書

賜夏國主詔書

與大金國書

與高麗王詔書

擬撰表本

建炎元年七月得旨擬撰

起居道君太上皇帝表本

臣某言神京不守坐失金湯天旆啓行越在草莽凡為臣子之列均深痛憤之情臣某誠悲誠感頓首頓首恭惟道君太上皇帝陛下遊神穆清宅心昭曠法堯舜之遜

禪濟家國之艱難方交兩宮之歡永享四海之養鄰邦
犯順戈戟暗於中原帝座移居鑾輿幸於朔野神人感
憤華夏悲摧而臣濫總帥權莫陪執馭迫羣臣再三之
懇請謂大寶不可以久虛勉徇輿情嗣守神器瞻行宮
而靡及慕慈訓以增懷輯睦師徒冀宗祊之可保撫寧
方夏佇車駕之言歸謹遣通直郎試太常少卿臣周望
奉表起居以聞臣無任

起居孝慈淵聖皇帝表本

臣某言戎馬薦興環日畿而布列帝都守致天步之
艱難萬國悼心三靈失色臣某誠悲誠感頓首頓首恭
惟孝慈淵聖皇帝陛下法禹湯之恭儉體堯舜之聰明
十載東宮令德聞於海寓踰年南面仁政浹于寰區適
當嗣位之初兩致鄰邦之寇割地增幣以生靈屈已而
講和擢甲登埤為廟社忘身而固守金湯失險羽衛啓
行致翠華之蒙塵瞻紫微而移座華夏失庇神人疇依
而臣叨總師徒莫陪羈勒迫羣臣之懇請嗣大寶以撫

臨仰遵勤儉之風庶格中和之治傷心北望緬懷異域
而增悲整駕南還尚冀敵人之悔禍謹遣通直郎試太
常少卿臣傅雱奉表起居以聞臣無任

靖康擬詔書

撫諭河北詔

闕

獎諭徐處仁詔書

闕有進呈劄子并御批見第五十一卷

起防秋兵詔

時敵騎出境朝廷恬然以為無事防邊禦寇之策置而不問公竊憂之與

同知樞密院事許翰議於上前謂今秋敵必再至宜預詔天下起兵防秋為捍禦之計上命草

詔以諭諸路安撫總管鈐轄司

朕初嗣歷服遭時艱難虎狼之羣敢肆陵侮侵犯邊境達于都畿賴宗廟社稷之靈賢士大夫勤王將士之力以克捍禦而倉卒之間輔臣失計劃三鎮以賂之天啓朕心斥去姦回決策堅守今者重兵尾襲賊騎遁逃朔部無虞與天下同慶然而敵情狡獪未有所懲秋高馬肥慮復侵軼非以虎符起天下兵控扼邊陲蕩攘羣寇則何以震懾狂敵奮張國威以定中興之業詔到仰諸

路安撫總管鈐轄司各下所管州軍遴選將佐訓練正
兵招填闕額繕治器甲儲蓄芻糧預脩軍須以聽朕命
夫一歲之間而再勤師旅良非獲已共愍大憤茲惟其
時故茲詔示想宜知悉

募民出財詔

時降詔誠諭諸路起防秋兵或者慮財不足公議於上前乞募民出財朝

廷等第推恩以激勸之庶幾可濟上命草詔以諭中外

朕嗣承丕緒夙夜兢惕思所以綏撫四海惠養元元以
為無窮之計而寇戎弗靖未能偃兵故將起天下之師

以振國威然而興師十萬日費千金方今積弊之後雖朕痛自刻勵罔敢汰侈罷斥浮冗粗給經費其於師旅之用誠未有以贍之也昔漢帝募民入粟塞下而師賴以濟今朕上為宗廟社稷之重將以定中興之業下為億兆蒼生之衆將以圖休息之期此忠臣義士協濟艱難之秋也應天下士民上戶有能推其財穀贏餘以佐軍興者州縣聽其自願不得抑勒不以多寡別項儲蓄專以為募兵養士之費具數申樞密院各以名聞朕將

等第推恩以為忠義之勸故茲詔示想宜知悉

戒諭姚古詔書

姚古為河東路制置使久駐師威勝軍不進上令草詔戒諭之

勅姚古太原為河東根本右控關陝左通朔部在三鎮
尤為重地金人攻圍殆百餘日兵疲糧乏勢危力殫羽
書日聞夙夜憂念以卿素著忠勇為時名臣故命統帥
諸將進兵應援近雖已復隆德威勝前扼南北關尚未
聞踰圍栢越徐溝以造太原之下致使賊馬猖獗侵掠
汾晉其何以解朕西顧之憂詔到其率勵士卒戮力用

命破堅却敵解圍太原以復忻代高爵厚祿朕何愛焉
故茲親筆詔示想宜知悉夏熟卿比平安好遣書指不
多及

賜夏國主詔書

時金人犯闕夏人亦起兵以擾西
垂鄰延路繼進夏人檄書上命草

詔賜夏國主解
其意以撫慰之

詔夏國主朕居春宮十有餘載弗敢怠逸四方所聞道
君太上皇帝享國日久厭萬機之繁爰議內禪朕辭不
獲命遂登大寶深惟祖宗建構之隆上皇付託之重夙

夜兢惕懼不克任而金人不道乘邪藥師背叛之故陷
沒燕山倣擾邊境達于都畿肆為貪殘劫質以往永念
卿屏翰之舊信誓皎然義當戮力同濟艱難以敵王愾
而陝西奏報乃言卿國點集重兵五路深入攻陷城堡
殺傷兵民朕惟卿明允篤誠世濟忠孝主于西陲藩屏
帝室多歷年所英聲流聞今至於茲殆朕德弗類嗣政
之初未能綏撫之所致也西顧悵然良自傷悼及得卿
延路帥臣章疏繳到卿國檄書公牒省覽再三乃知搆

兵起于誤聽檄書初言中國失德數事皆曩時大臣誤國上皇已降詔書深自悔悼今朕克已求治以儉先天下凡淫巧奢麗之具一切屏去蠹國害民之臣咸已竄誅前日之事所不復論中言賀正人使之歸所見京城整齟兵甲修治樓櫓疑有姦臣變亂此乃隄防金人之故豈有他哉終言與本朝信誓之久義須救援以此知卿忠義有素誤聽致此初無他心至於過差之辭朕初不之罪也公牒言國書之寶與舊不同此乃有司用寶

差誤已重竄責凡茲細故朕既釋然卿亦宜亮夫金人以蕞爾海隅之國背天逆神滅絕契丹遂陵中國淫暴滋甚使其得志何有於卿哉孤軍深入理當勦殄朕以皇弟肅王在其軍中第命將士驅逐出境邊城晏然前遣康隨鄭惟康道意必亮此誠詔到卿宜釋去疑慮撫諭將士抽迴甲兵修好如故高爵厚賜朕何愛焉今遣武功大夫王佑武功郎馬持告諭故茲詔示想宜知悉夏熱卿比平安好否遣書指不多及

與大金國書

幹離不邀割三鎮既退兵三鎮之民為朝廷堅守誓不從敵上命草書與

敵主

道意

靖康元年五月姪大宋皇帝致書于伯大金皇帝闕下菲德之居東宮十有餘年矣邇者道君太上皇帝厭萬幾之煩遂議內禪肆及眇躬膺受大寶惟懷永圖願修鄰好而兵革擾攘未遑致問其為懷企何可勝陳言念往日遣使海上通兩國之歡信誓昭然金帛之輸未嘗有闕誠謂世守茲盟無有携貳而皇子郎君乃拊拾細故

敗棄舊約因叛將藥師以兵內嚮虔劉邊陲深入畿甸
乘中國之不備遂肆憑陵誠非所望於善鄰也城下之
盟蓋緣輔臣怯懦失計重鎮寶貨一切惟命皆出要盟
神所不臨豈復可用而况還師渡河劫質肅王已復渝
約勤王之師百萬集于城下將士憤怒咸欲邀擊徒以
肅王在軍之故深戒用兵使得全師以歸而皇子郎君
肆為淫暴屠戮良民係纍婦女焚蕩室廬不可勝計緣
是之故三鎮之民皆出死力為國堅守雖朝廷號令有

所不從此乃軍前失信之所致也重念頃者道君太上
皇帝與大金皇帝歡盟相得之厚既滅大遼分燕山之
故境以歸中國累年于茲中國未嘗得粒粟尺帛之助
而漕運之勞金幣之費不可勝計今燕山陷沒既渝前
約又欲併取三鎮之地使敝邑無以為屏翰是豈大金
皇帝之旨哉且皇子郎君雖貴人臣也坐受本朝宰臣
親王之拜敗盟爽約妄起兵端黷貨無厭求取不已有
一於此豈人臣之所當為哉敝邑無辜橫遭屈辱以大

金皇帝之聽睿仁慈寧不諒此遠恃英明敢以實告前
日皇子郎君割地求賂廣有要索敝邑不校悉皆聽從
彼此非誠人情不遠誰不知之欲尋往日之盟以結兩
國之好使兵革不用生靈休息莫如度其所可行者重
結盟誓以信守之昔我烈祖真宗皇帝與大遼盟于澶
淵百有餘年未嘗少有變故天祚失德不可振起乃至
于茲大金皇帝倘垂英察使燕山歸于大邦三鎮安于
敝邑各得其所保茲舊疆信使交通歲幣修好傳之永

世為子孫無疆之休顧不遑與謹遣使人往布誠悃儻
或見允願示佳音所有黏罕國相軍馬見在河東亦冀
召還以篤和好有少禮物具如別錄中夏炎蒸遠祈保
毓

與高麗王詔書

金人退師朝廷遣使臣侯章等至高麗國上命草詔與之

詔高麗國王朕居春宮十有餘載雖德不類罔敢怠逸
亦惟四方所聞道君太上皇帝享國日久厭於萬幾之
煩爰議內禪朕辭不獲命遂登大寶深惟祖宗基構之

隆上皇付託之重夙夜警惕懼不克任而金人不道乘
郭藥師背叛之故陷沒燕山俶擾邊境達于都畿方朕
即政之初遭此震驚以故未及與王相聞朕惟王世濟
忠孝膺受顯冊奄有三韓之地屏翰之舊久受國恩肆
我烈祖神宗皇帝遣使修聘禮意備至情同骨肉義則
君臣以至于我道君太上皇帝頻年遣使錫賚不貲待
遇加等朕惟中國與王遠隔遼海壤斷土絕而恩禮如
此豈有他哉亦惟藩衛中國庶幾艱難有以敵愾茲者

金人乘我不備與叛人偕來深入內地王國與之為鄰相望無數百里之遠而不能蕩其巢穴以報中國豈累朝待遇殊絕之意邪彼金人者固嘗臣屬於王以蕞爾海隅之醜背天逆神絕滅契丹遂陵中國淫暴滋甚使其得志何有於王哉孤軍深入理當勦殄朕以其劫質肅王而去第命將士驅逐出境邊城晏然方將起天下之兵問罪小醜王其率勵師衆相為表裏以行天誅夫糾遯王慝獻俘本朝以報中國數世之恩大忠也取亂

侮亡誅討淫暴以伸威沙漠之外大義也拓地開境覆
其巢穴以報驟驕不臣之罪大威也一舉而三者皆得
王何憚而不為哉高爵厚賜朕於王無所愛惜王其勉
之今遣侯章等往諭至意夏熱比平安好遣書指不多
及

梁谿集卷三十三

欽定四庫全書

梁谿集卷三十四

宋 李綱 撰

表本詔書下

建炎擬詔

勅榜詔

戒諭武臣詔

撫諭河北河東路詔

勅榜獨留中原詔

戒勵士風詔

勅榜詔

朕以菲德獲承宗祧以臨士民之上屬時多艱未知攸濟慄慄危懼若將隕于深淵洪惟祖宗膺受天命覆育函夏百有七十餘載德隆恩普振古所無道君太上皇帝以憂勤而內禪孝慈淵聖皇帝以恭儉而纂圖海內乂安蒼生蒙福適金人之入寇挾詐謀以欺師待以不疑墮其姦計神都失金湯之險翠華有沙漠之行二聖既

遷六宮皆從迨朕叔父弟昆宗室戚屬悉被驅逼禍故
之臻亦古未有是用夙夜震悼于朕心念父兄幽辱于
敵廷憫生靈重罹於兵革飲泣嘗膽不遑寧居惟爾四
方士民抱負忠義其伊恤朕躬以共濟於艱難以致安
于宗社載念行在將士適當隆暑暴露之久尤軫朕懷
當時加犒設州縣民戶募師勤王調發之煩誠可嘉憫
當厚與撫循賦斂之厚當議蠲減法令之弊當議改更
潰兵為盜因間虜掠殘破郡邑雖已降赦令當遣使招

集許令自新賊吏為姦乘時掎克重困吾民罪不可貸
當遣使按治寘于典憲靖康之間忠義敢言之士或至
竄逐當悉召還今日以往智謀奇畫之人如能獻陳當
悉擢用旁招俊乂竄黜姦回協成治功以篤中興之烈
於虜天下之士大夫未忘我之祖宗當同心以相扶天
下之軍民不顯淪于異域當協力以保守國勢既昌天
命益固庶幾鄰敵悔禍奉還鑾輿則予一人以寧爾亦
有無窮之聞不其臆歟故茲詔示想宜知悉

戒諭武臣詔

朕惟祖宗創業守成垂二百年涵養士大夫至矣靖康
變故仕於中都者曾無伏節死難之士而偷生取容何
其衆也甚者乘時為姦靡所不至實為中國羞公議弗
容姑取跡狀尤顯著者量加寬黜以為臣子之戒夫節
義正所以責學士大夫也至於武臣卒伍理當濶畧以
責後效惟王宗澁首引衛兵逃遁致都城失守不可不
責其餘姑務含容一切不問咨爾有衆其體至懷故茲

詔諭各宜知悉

撫諭河北河東詔

勅河北河東諸路州縣守臣將帥忠義軍民等朕惟祖宗德澤在民垂二百年天下久安靡有變故而宣和靖康以來國家多難金人內侮道君太上皇帝下哀痛之詔講揖遜之禮比德堯舜古今鮮倫孝慈淵聖皇帝以恭儉之德爰受內禪海內欣戴日俟治康而暮歲之間戎馬再侵墮敵姦計但以講和一事終至宗社阽危既

盡取玉帛子女公私財力為之耗竭乃始劫遷二聖中
宮洎皇族尊幼中外嫺戚以行侵陵之禍振古未有朕
以介弟受命總師臣民推戴迫以大義入繼大統重念
父兄之辱飲泣嘗膽疾首痛心願與天下忠臣義士共
濟艱難而近者使臣來自朔郡審聞兩路守臣義不愛
生誓以死守彼雖憑恃甲兵之衆敢肆攻圍而能率勵
士民屢摧其勢其忠義軍民等倡義結集動以萬計邀
擊其後功績茂著朕甚嘉之夫河北河東國之屏蔽也

朝廷豈忍輕棄靖康之間特以金人憑陵不得已割地
賂之將以保全宗社止兵息民而金人不道攻破都城
易姓改號劫鑾輿以北遷則河北河東之地又何割哉
已命遣師以為應援爾兩路州縣守臣及忠義之士如
能竭力捍禦保有一方及糾集師徒力戰破賊者至建
炎二年當議疇其勲庸授以節鉞其餘官吏軍兵第加
優賞應稅賦貨財悉許移用官吏將佐悉許辟置朝廷
更行量力應副為國藩屏以昭茂功庶幾中原弭寧生

靈休息天而悔禍二聖有可還之期則予一人膺受多福爾亦有無窮之聞不其韙與故茲詔示想宜知悉

勅榜獨留中原詔

朕惟祖宗都汴垂二百年天下又安重熙累洽未嘗少有變故承平之久超軼漢唐比年以來圖慮弗臧禍生所忽金人一歲之間再犯都城信其詐謀終墮詭計盡取金帛子女遂邀二聖鑾輿六宮戚屬悉擁以行非常之禍振古未有四海臣子孰不痛心肆朕纂承永念先

烈眷懷舊京潸然出涕思欲整駕還京謁款宗廟以慰士大夫軍民之心而兵火之餘民物如故朕之父母兄弟宗族靡有留者顧瞻宮室何以為懷是用權時之宜法古巡狩駐蹕近甸號召軍馬以防金人秋高氣寒再來入寇朕將親督六師以援京師及河北河東諸路與之決戰已詔迎元祐太后逮遣六宮及衛士家屬置之東南朕與羣臣將留中原以為爾京城及萬民百姓請命于皇天庶幾天意昭答中國之勢浸強歸宅故都迎

還二聖以稱朕夙夜憂勤之意應在京屯兵聚糧修治樓櫓器具並令留守司京城所戶部疾速措置施行咨爾士大夫軍民體朕至懷無有疑慮故茲詔示想宜知悉


戒勵士風詔

朕觀古之為士者何其分義之明而忠厚之至也承平之時靡好爵享豐祿相與同安榮多事之際不擇地不苟免相與同患難故人之好我至於示我周行王事靡

監至於不遑啓處而鹿鳴四牡之詩作先王之澤可謂
盛矣祖宗涵養士類垂二百年教以禮樂風以詩書班
爵以貴之制祿以富之於士無負而士之所以圖報國
家者不能無愧於古人日者二聖播遷宗社幾至於顛
覆而伏節死難者罕有所聞其故何哉肆朕纂承慨然
思任羣材相與協濟修政事繕兵甲以奉迎鑾興而士
大夫奉公者少營私者多徇國者稀謀身者衆乞去則
必以疾病為辭訟檄以自便者相望於道途避寇而去

官者日形於奏牘甚者至假託親疾不俟報而東下挈
家而遠遁夫禮義廉恥正所以責士大夫也所守如此
朕何望焉豈朕初嗣大位所以訓告者未至歟將士大
夫狃於故習而未能遽革歟已詔甚失節者寘之極典
其次投之遠方為多士萬世之戒矣其自今已往各恭
乃職一乃心助予一人克復大業底綏四方以匹休於
隆古敢有弗率弗迪尚蹈前愆在內委御史臺在外委
監司彈劾以聞邦有常刑朕不敢赦故茲詔示想宜知

悉



梁谿集卷三十四

欽定四庫全書

集部

梁谿集卷三十五至
七

詳校官庶吉士_臣張溥

侍讀_臣孫球覆勘

總校官知縣_臣楊懋珩
校對官中書_臣潘奕雋
謄錄監生_臣李天相

欽定四庫全書

梁谿集卷三十五

宋 李綱 撰

擬制詔一

制二十一首

宰相除三少

極處中曰紫微之垣莫親於輔相斗戴六曰文昌之府
實本於政機眷予忠蓋之臣茂膺考詢之典誕宣顯冊
敷告明庭具官某直諒而粹夷溫恭而博達學足以謀

王體而斷國論材足以亮邦采而熙天功頃被眷知擢
陪機務履一德而不爽告辰猷而允臧民具爾瞻宜輔
台德屬茲衮職之闕延登揆路之華進秉鈞衡正位槐
鼎朕方憲天以臨八極體道以照百官仰贊三光之明
俯遂萬物之理資爾變調之助成予化育之功希冕冢
車陟崇資於亞保金印紫綬膺峻任於元台申衍爰田
倍敦真食式昭物采併示龍光於戲帝舜選於衆而舉
臯陶實惟股肱元首之一體商宗審厥象而得傳說有

若酒醴和羹之相須立非常之事必賴非常之才建無窮之基則有無窮之聞往佑乃辟永孚於休可特授少保太宰

宰相除三公

代天理物夙隆揆路之勲論道經邦宜補袞職之闕眷予碩輔為國蓋臣泰山巖巖乂副萬邦之望赤舄几几往登三事之崇播告路朝誕敷顯冊具官某裕和而肅乂敦厚而高明智周萬務之微學洞六經之蘊蚤以令

聞揚于禁塗臣作朕股肱擢預經綸之政帝賚予良弼
遂膺考詢之求勩相國家教寧方夏燮諧四氣之序參
聽百官之成當軸處中材足以運動樞極贊元經體道
足以和同天人禮樂興於百年聲教訖于四海俾予從
欲以治時乃佐王之休疇其勲庸宜有褒寵備三公之
典冊爰隆帝傳之聯秉上帝之鈞衡遂正真相之任衍
戶租而倍食錫國邑以疏封併昭物采之多用侈台符
之峻於戲鹽梅正味久調制於鼎司衮繡命章往參華

於槐位式是百辟毗予一人益敦變理之功期底盈成之業無替朕命永孚於休可特授太傅

觀文殿大學士中太一宮使除少保太宰

論相宅百揆以亮采而惠疇建官曰三孤俾二公而弘化眷予舊弼為時宗臣宜還官於台司以大熙於邦政式涓穀旦播告路朝具官某敦大而直方醇深而簡重學博而守之以約該經術之淵源智周而用無不宜適事功之機會蚤膺眷遇縣厯清華擢陪國鈞實輔台德

贊元經體道足以和同天人當軸處中材足以運動樞
極中辭幾務之要退即燕休之安佩玉長裾聯清班於
秘殿珍臺間館領庸使於殊庭遽閱歲時休有譽處蓋
來歸於揆路以寅亮於天功參華亞保之聯進任中臺
之長倍敦井賦申衍戶租式昭體貌之隆庸示寵光之
茂於戲丞相之於漢蓋將附百姓而撫四夷冢宰之于
周所以統百官而均四海仰穆上天之緯下厚蒸民之
生朕方圖任於舊人爾其永弼於彛憲式是百辟撫此

萬邦往既厥心同底于道可

觀文殿大學士中太一宮使除少保左輔

朕駿惠先猷肇修官制允釐輔弼之任是正公孤之稱
祇若新書以大熙於邦采登延舊德宜還總於台司涓
選剛辰誕揚休命具官某器涵莊重德稟粹和學通今
古之淵源識際天人之精稔蚤持從橐有獻納論思之
忠擢預政機得贊襄勵翼之體遂膺夢卜之舉進秉鈞
衡之權相業維優師論參穆中辭幾務之要退即燕休

之安兼秘殿之隆名領殊庭之庸使年德彌劭聞望益
休盡還揆道之官茂底格天之業篆車希冕扶陞亞保
之崇青瑣黃扉職峻東臺之長倍敦并賦申衍戶租式
昭體貌之隆庸示寵光之渥於戲用人惟已朕方圖任
於元勲以道事君爾其承觴於厥辟渙號聿資於審覈
非藝允賴於糾繩毗予一人式是百辟無替朕命往其
欽哉

觀文殿大學士中太一宮除節度使

曳裾鳴玉入聯舊弼之班推轂授師出總元戎之政列
職雖異倚任惟均眷予心膺之臣克備爪牙之寄誕揚
渙號播告大廷具官某莊肅而裕和體大而明允學際
天人之蘊材兼文武之資自結眷知寢階華近雍容從
橐有獻納論思之忠密勿政機得贊襄勵翼之體中辭
釣軸之要退即祠宮之安裴度在朝卓爾股肱之舊方
叔克壯凜然將帥之風輟祕殿之華資付齋旒之重柄
蔽自朕志穆于師言淑旂綏章備多儀於大將珍臺間

館仍膚使於殊庭衍食戶租倍敦井賦式昭物采庸示
寵光於戲吉甫之憲萬邦實兼該於文武仲山之式百
辟不吐茹於剛柔朕方宣明道德仁義之威爾其鞏固
藩垣屏翰之勢對揚休命益茂壯猷

彰信軍承宣使除武寧軍節度使

推轂授師總將權於閫外出奇應變制敵命於穀中參
稽勲烈之崇宜懋褒嘉之典我有明命揚于大廷具官
某沈驚好謀直剛不撓少有四方之志出逢千載之辰

暢漠北之威名厲山西之勁氣敦詩說禮有古將帥之
風懷德畏威得吾士卒之用入宣勞于宿衛出著效於
干城疇咨鎮撫之材爰付邊陲之寄賴爾經畧紓予顧
憂而能因勢乘機運籌制勝披堅執銳親居矢石之間
斬將搴旗躬致馘俘之獻日百里以闢國月三捷而奏
功大震天聲一清夷落是用旌其功伐畀以節旄鎮
雄藩盡護諸將神旗豹尾備大將之威儀祕畧龍韜新
元戎之紀律敦陪井賦申衍戶租併示恩榮式昭眷獎

於戲高爵厚祿朕不吝於報功禦侮折衝爾毋忘於敵愾
勉罄介牙之力益隆屏翰之強祇服訓辭茂對光寵

節度使中太一宮使兼侍講移鎮除檢校三少開

府儀同三司

侍幄帷而處朝廷蓋密資於獻納易節旄而兼將相式
寵報於勲勞眷予忠蓋之臣茂舉褒嘉之典誕敷渙號
播告明庭具官某溫厚而剛明粹夷而莊重擅儒宗之
碩學躬王佐之宏材頃被明揚擢司幾務謀王體而斷

國論備著猷為亮邦采而熙天工展盡底蘊中辭政柄
之劇退即燕私之安大纛高牙備多儀於上將真祠間
館領膚使於殊庭日造治朝參陪講席閱時滋久登聞
彌休惟尊道樂義之無窮豈崇德報功之敢後陞華亞
傅易鎮雄藩鼎鉉公槐峻視巖廊之秩路車齋鉞益隆
方面之權衍食戶租敦加井賦併昭物采式示寵光於
戲文武兼資吉甫作周邦之憲將相並任裴度為唐臣
之宗顯膺體貌之崇茂著股肱之美往綏福履毋煩訓

辭

知樞密院除節度使醴泉觀使

右府本兵久策勲於宥密齋壇授鉞宜錫命于蕃宣眷
惟心膺之良克任爪牙之寄誕揚綸綍敷告縉緹具官
某敦厚而直方裕和而肅毅學貫古今之蘊才兼文武
之資夙茂聲華踐揚要近擢由政輅進揔樞庭告辰猷
而具臧秉一德而不爽運籌帷幄折衝樽俎之間制勝
邊陲行師枕席之上日百里以闢國月三捷而奏功獨

任指蹤坐收成效方倚壯猷之畧遽陳均逸之辭章屢
却而復來誠有加而無已疇其勲烈付以節旄大纛高
牙備多儀於上將真祠間館領膚使於殊庭雖蹙即於
燕私初不離於王室敦陪并賦併示寵光於戲勩相我
家朕敢忘于舊德承弼厥辟爾無遂於遐心往綏壽祉
之多式副眷懷之渥

殿帥

漢置期門羽林之軍以夾輔宮省唐開折衝果毅之府

以鎮衛京師惟我本朝若稽前代宿重兵於輦轂列屯
戍于邦畿所以救寧寰區拱翊宸極俾統貔貅之旅必
資心膂之良爰擇剛辰誕敷顯命具官某直方而不撓
勇鷙而好謀擅玉帳之威名稟金行之勁氣敦詩說禮
有古賢將之遺風懷德畏威得吾士卒之樂用自共武
服屢奏膚功折馘執俘敵愾禦侮執干戈以嚴社稷之衛
爾克著于勤勞聞鼓輦則思將帥之臣朕敢忘于錄用
召自邊圉付以節旄典司宿衛之兵總領營屯之政入

則侍內朝之文陞出則扈屬車之清塵淑旂綬章壯元
戎之體貌路車齎鉞備上將之威儀申行戶租敦陪井
賦式昭物采併示寵光於戲予王爪牙詩刺圻父之失
職克用常吉書美虎賁之得人爾其明紀律以訓齊師
徒辨次舍以肅清徼道式遏姦宄作固蕃垣得盡其心
俾士氣之增厲乃安斯寢致王心之載寧則予一人無
疆惟休而爾亦有無窮之聞

觀文殿學士諸路經畧安撫使除節度使

學以即戎籌略必資於儒將齊而授鉞節制以寵於元
勲武隆方面之權克重藩垣之體我有渙號敷于大廷
具官某敦大而直方剛明而肅義識洞幾微之表材兼
文武之全蚤踐要途遂參機務謀王體而斷國論肩輔
弼之一心有常德以立武功蘊將帥之遠略輟從廊廟
坐鎮邊陲緩帶輕裘蓋折衝於樽俎敦詩說禮豈專意
於韜鈴訓齊貔虎之師建築金湯之險日百里以闢國
月三捷以奏功奮揚天聲震疊夷落疇其勲績宜有褒

陞是用解祕殿之華資付齋旄之重寄高牙大毒縣備上
將之多儀渠門赤旂壯元戎之異數敦陪井賦衍食戶
租以隆閭外之威以迪師中之吉於戲有奔走禦侮朕
方極於倚毗無智名勇功爾宜務於持勝益勵猷為之
壯以綏福履之崇祇服茂恩無忘明訓

吏部尚書除節度使

入踐中臺之職實首六卿出分外閫之權盡護諸將惟
倚仕之不異豈恩禮之或殊眷予心膂之臣克備爪牙

之寄誕敷顯命播告治朝具官某挺高明之資蘊渾厚之量文章典雅久居言語侍從之班問學深醇雅有獻納論思之益頃由人望擢長天官銓衡有方風績彌劬維藩垣之重任資文武之全材輟自近臣委以方面顧邊圉之方棘豈頗牧之可留推轂授師克壯元戎之勢擁麾乘塞式寬西顧之憂宣國威靈賴爾經畧即佇膚公之奏以嚴武服之共申衍戶租敦陪并賦式昭物采併示寵光於戲卻縠之將中軍是為說禮敦詩之帥亞

夫之屯細柳詎同棘門霸上之師惟恩信足以得士卒之心惟威懷足以制羗戎之命往服朕訓永觀厥成

彰化軍節度使熙河路經畧安撫使除檢校少保
雄威軍節度使

擁齋旄而乘塞克隆元帥之勲易邊鎮以旌能仍峻貳公之秩眷時宿將茂舉徽章播告路朝亶孚師聽具官某剛毅不撓沈鷖有謀擅虎帳之威名稟金行之勁氣夙備爪牙之任出宣屏翰之風建安定之節旄盡護諸

將當臨洮之方面統御列城賴爾撫綏紓予憂顧而能
料敵制勝禦侮折衝運籌帷幄之中玩寇掌股之上宣
明威信叛則討而服則懷訓齊甲兵戰必勝而攻必取
屢致馘俘之獻日增壘堞之修聲名隱然勲績茂矣宜
換秦川之節俾參亞保之聯豹尾鸞旂備威儀於大將
篆車希冕視服命於三孤申錫爰田敦陪真食併示龍
光之寵益崇帥閫之權於戲聽鼓鼙則思將帥之臣朕
敢忘於丕績執干戈以嚴社稷之衛爾無替于前勞益

勵壯猷以永終譽

節度使殿前都指揮使除檢校少保移鎮充鄜延
路經畧安撫使

提七萃之旅入則拱衛於巖除建六纛之威出則撫臨
於邊徼克備爪牙之寄聿資心膂之臣視秩台司增嚴
帥閫我有明命揚于大庭具官某偉量沈雄英資果毅
蚤膺勇爵備歷戎行懷干城禦侮之材著斬將奪旗之
績疇其勲烈付以節旄擢帥殿廬肅軍容於壁壘總監

虎士嚴禁衛於鈞陳忠義自將謹密不出得吾士卒之
樂用有古將帥之遺風蠢彼夏戎干我王畧顧邊圉之
方棘豈頗牧之可留勉為朕行用錫爾祉鎮高奴之重
地坐制黠羌易安定之雄藩盡護諸將篆車希冕視服
命於三孤齋鉞琱戈備威儀於元帥敦陪并賦申衍戶
租併隆體貌之私益壯藩垣之勢於戲中西域而立幕
府定遠振玉關之名整六師以討先零營平上金城之
畧顧王者之師有征而無戰惟良將之策不戰而屈人

往益勵於壯猷庶永觀于成績

觀文殿學士除節度使知大名府兼北京留守

擁齋旄於外閭式隆將帥之權分符竹於留都克壯藩垣之勢眷予舊德為世宗臣方資保釐之功宜茂褒崇之典誕敷渙號播告治朝具官某敦靜而剛方溫恭而博達富淵源之碩學蘊經綸之偉材屢陪國鈞實亮邦來履一德而不爽告辰猷而具臧中辭幾務之繁祈即燕休之逸冠隆名於祕殿領膚使於殊庭遽閱歲時休

有譽處顧陪京之闕守非元老而奚居勉為朕行用錫
爾祉元戎峻扶建南國之節旄全魏雄藩付北門之莞
鑰宣威稜於六蠹摠節制於列城阜成兆民盡護諸將
賴爾鎮撫紓予顧憂敦陪邑戶之多併示寵光之渥於
戲申伯之聞四國實總藩宣吉甫之憲萬邦兼資文武
固封圻以衛王室守典常以承天休往既厥心無替朕
命

戚里承宣使除節度使

爵祿以馭富貴實為八柄之先藩屏以建親賢蓋本九
經之重眷惟戚畹之懿茂舉疏封之章播告大庭亶孚
羣聽具官某秉心淵塞毓德粹和承世胄之華而無貴
驕之習服詩禮之訓而有儒雅之風蚤被眷知寢階華
近屬橐鞬以奉御鳴佩玉以造朝夙夜惟寅靖共自好
宜付節旄之寵益隆肺腑之親鈇鉞車旗備威儀於上
將帶裳幅舄昭命數於元侯申衍戶租敦陪井賦式昭
物采併示寵光於戲建官惟賢私恩宣廢於公議保身

以哲居寵必思于履危惟恭儉足以作德而日休惟忠孝足以致身而衛主往綏福履無煩訓辭

皇弟除太傅山南東道節度使開府儀同三司進

封越王

朕因心以友于天倫建侯以蕃于王室疏爵以貴韜如棠棣之華裂土而封屹若磐石之固誕敷渙號播告明庭具官某英粹凝姿溫恭秉德允出神明之胄居多致思之文大雅不羣邁河間之偉量為善最樂有東平之

格言曩稽立愛之經茂著維城之義疏封滋久譽望彌
休疇其德業之崇宜舉彛章之峻是用契邇而協吉按
圖而定名表為真王奄授樂國高牙大纛建一道之節
旄赤舄桓圭備三公之典冊胙山川于南土賜徒御於
中軍陪食爰田衍封真賦以固本根之重以隆屏翰之
強於戲篤親愛之恩朕敢私於爵祿長富貴之守爾其
戒于侈驕惟明哲可以保身惟忠孝可以衛上往圖慶
譽益稱龍光

皇伯節度使開府儀同三司除郡王

周家之建同姓以廣親親之恩漢室之王諸侯以隆貴
貴之義若古有訓越予不忘載惟伯父之賢宜舉彛章
之峻式涓穀旦敷告明庭具官某資識純明器量宏遠
允出神明之胄為時宗室之英東平好賢雅著忠孝之
譽河間博古雍容禮樂之文曩稽立愛之經茂舉建侯
之典高牙大纛式彰帥閫之雄華衮命圭兼視台衡之
貴歲時滋久聞望彌休夙夜惟寅以日趨於朝請溫恭

有恪克顯相於烝嘗疇其賢勞宜有褒陟是用契龜而
協吉按圖以定名表以王爵之崇昨以茅土之重大啓
爾宇錫之山川時庸展親分厥寶玉以益本支之固以
增屏翰之強於戲篤親愛之恩朕豈私於好爵持高滿
之戒爾宜保於令名茂對龍光往綏壽祉

皇子封節度使國公

朕握符御極仰承列聖之休荷天降康申錫多男之慶
眷嗣賢之挺秀稽癸憲以疏封爰擇剛辰誕敷渙號皇

弟幾子天材毓粹帝武發祥函岐嶷之英姿稟中和之淑氣溫文日就聰智夙成甫臨剪髮之期茂舉建侯之典昨以樂土錫南國之山川授以全師俾中軍之徒御封建厥福耆定乃家赤舄桓圭備上公之典冊路車齋鉞兼大將之威儀衍食戶租敦陪井賦以崇廟社之祉以篤邦家之光於戲周建親賢式固維城之義漢封子弟益隆磐石之宗惟作德罔不在初肆享國多歷年所往綏壽嘏茂對龍光

皇子除檢校少保節度使郡王

朝廷尊爵式昭貴貴之儀父子主恩必厚親親之典眷
時賢嗣夙挺天材其疏茅土之封以篤邦家之慶飭宣
典冊敷告縉紳皇子具官某雅量淵澄英姿玉粹鍾五
行之秀氣備四序之純和聰智夙成溫文自得曩稽立
愛之義茂舉建侯之章擁元戎之節旄備上公之袞舄
尊德樂道克循就傳之規立禮興詩日懋通經之訓載
遵彝制宜有褒崇是用按圖以定名拂龜而協吉奄授

樂國易鎮雄藩言觀其旂錫中軍之徒御大啓爾宇昨
南土之山川越陪邑戶之多兼畀國租之實併彰異數
式慰慈懷於戲保佑自天並貺本支之茂封建厥福聿
宗廟社之休惟忠孝可以報君親之恩惟恭儉可以長
富貴之守往服朕命益介壽康

皇子除太傅兩鎮節度使封韓王

朕荷天保佑錫慶蕃昌眷時次嗣之賢夙挺天材之秀
異宮築室將行就邸之儀昨土苴茅宜錫䟽封之典誕

敷渙號播告明庭皇子具官某德度粹溫性姿莊重氣
稟中和之淑體函岐嶷之英流慶宗藩發祥帝室稽立
愛之前訓率建侯之舊章有鸞其旂任總元戎之貴載
黼斯服秩視三公之崇尊德樂義而循就傳之規說禮
敦詩而懋通經之訓連紫宮而開第歷告日以爰居考
于典常宜有褒寵是用契龜而協卜按圖而定名表為
真王奄授樂國車旗齋鉞兼兩鎮之節旄山川附庸撫
十圻之民社敦陪并賦申衍戶租以隆宗廟之休以壯

藩垣之勢於戲朝廷尊爵式昭貴貴之文父子主恩克
篤親親之義惟恭儉可以長富貴之守惟忠孝可以盡
臣子之心茂對龍光益綏壽嘏

皇姪節度使除郡王

爵祿以馭富貴允為八柄之先藩屏之建親賢實本九
經之重眷時猶子之懿錫以苴茅之榮涓選剛辰誕敷
顯冊皇姪具官某性姿端亮識度粹夷胄出神明初靡
貴驕之習訓通詩禮雅有致思之文曩稽立愛之經茂

著維城之義建元戎之旄鉞視三公之服章夙夜惟寅
會同見齊莊之色溫恭有恪烝嘗備顯相之誠賢儀浸
明師論參穆疇其聞望宜有寵褒是用按圖而定名契
龜而協吉啓其土宇疏以王封敦陪井賦之多衍畀國
租之實增重翰垣之勢益宏宗祐之休於戲擅威福之
權私恩不廢于公義長富貴之守居寵當思於履危茂
對龍光往綏壽祉

梁谿集卷三十五

欽定四庫全書

梁谿集卷三十六

宋 李綱 撰

擬制詔二

制十三首

誠諭士大夫敦尚名節詔

朕嗣守基圖託于士民之上夙興夜寐罔敢怠遑思所以圖回治功陶成風化者實賴士大夫砥節礪行作民孚先以善天下之俗今則不然背公營私附下罔上無

宿道向化之志有締交死黨之心集詬頑頤而廉恥之風衰冒沒輕儇而忠厚之行熄方其平居高論闊議真若可信一旦遇利害僅如毛髮遽失其守責其立朝可觀臨大節而不可奪也難矣名節若此朕何望焉豈朕所以帥之者未至歟將狃于流俗而未易遽革歟昔先王之盛時在位皆節儉正直德如羔羊而風化之所行至於中林之兔置莫不好德漢上之游女無思犯禮何其盛哉朕甚慕之士大夫其思所以革心易慮稱朕意

者務敦實而去浮華止奔競而崇靜退使廉耻之風忠厚之行藹然著明足以鼓動當世則爵祿之加何吝之有詩不云乎靖共爾位好是正直神之聽之介爾景福易不云乎鳴鶴在陰其子和之我有好爵吾與爾靡之可不勉歟其或不悛邦有常刑朕不汝貸故茲詔諭想宜知悉

誠諭三省密院修舉熙豐政事詔

朕惟神宗皇帝考道據德制法作憲新美百度允釐庶

工若昔大猷肇造三省樞密院凡天下之政悉分統之
曰中書省根本機務實專敷奏除授之任曰門下省出
納命令實掌論駁省讀之職曰尚書省奉行政事所以
總治曰樞密院典司樞要所以本兵由中以制外端本
以御末綱紀法度燦然畢陳是以熙豐之治格于上下
與古匹休何其盛哉肆朕纂承駿惠先烈繼志述事罔
敢怠遑熙豐之所施設而已然者遵制揚功而率由之
熙豐之所有意而未備者增光潤色而推廣之制禮作

樂興事就功以大有為于當世法完令具布在方冊施
于四方實賴三省樞密院臣僚維持緝熙各揚厥職修
舉政事以紹隆神考之丕績惟爾六七大臣其尚同心
一德協恭和衷可否相濟于未然之前號令必行於已
出之後夙夜匪懈勤勞王家永孚於休同底于道則予
一人膺受多福爾亦有無窮之間不其臧歟故茲詔諭
想宜知悉

誠諭百官毋得越職犯分詔

朕惟先王設官分職以法為分小大詳畧各有等差猶之耳目股肱相待以成體罔或侵越故能總衆職修庶政而天下治惟我神考若昔大猷肇新官制內之省臺寺監外之監司郡縣之吏允釐厥職纖悉完具布在方冊炳若丹青肆朕纂承祇適先烈屢下詔書不匿厥旨俾官修其方毋得越職犯分以干邦憲庶幾繼志述事與三代同風而比日以來卿士大夫不安分守非所當議倡為險膚非所當為公肆妄作無宿道向方之志有

沽激僥倖之心豈朕所以告戒之未至歟將士狃於流俗而未易以遽革歟傳曰侵官冒也離局姦也詩曰靖共爾位好是正直神之聽之介爾景福古之君子明于義命而思不出位故能受靖共之福而無姦冒之刑朕甚嘉之于大夫其思所以安於分守者各共乃事齊乃位度乃口以聽予一人之作猷其或不恭邦有常刑必罰無赦故茲詔諭想宜知悉

誠諭省臺寺監修舉職事詔

昔我神考若稽大猷董正治官允釐邦采省臺寺監各有攸司本末維持大小承式綱紀號令百度鼎新肆熙豐之治格于上下雖三代之隆無以加也朕纂紹丕圖祇適先烈宵衣旰食勵精為治思所以繼志述事以昭先帝之休德者顧官制布在方冊炳如丹青制而用之存乎法推而行之存乎人屢降詔書具宣德意庶幾卿士大夫修舉職事振起治功以追熙豐之盛而比日以來省臺寺監安習因循偷惰苟簡有豐祿營私之志無

守法奉公之心慢令瘵官玩歲愒日尚書政事之本動
多稽違御史風憲之司恬不糾察寺監失職百官廢弛
夫省臺寺監所以推行朕之法令奉朝廷而倡郡縣者
也曠慢若此朕何望焉豈朕所以率之者未至歟將告
教不足以感乎必待刑戮加焉而後革歟書不云乎功
崇惟志業廣惟勤卿士大夫其思所以克勤勵志宿道
向方以顯白功業者務稱朕意其或不恭邦有常刑朕
不汝貸故茲詔示想宜知悉

誠諭監司按察州縣詔

朕祇紹丕基撫有方夏勵精求治興事就功皆以利安
元元為本深懼州縣之吏不能承流宣化達于吾民建
置監司分道按察或總漕計或司詳刑或掌常平之政
或專學校之法職雖不同而所以按察州縣其任一也
方其出使朕親御便殿以臨遣之及其還歸復使進對
以盡諮謀度詢之義視遇之禮亦已重矣庶幾德意志
慮得以下達而吏之臧否民之利病不壅于上聞內自

畿甸外薄嶺海萬里之遠風流而令行德洋而恩普吏
稱其職民安其業以底太平之盛而監司未有卓然修
舉職事稱朕意者其故何耶今州縣之間貪吏依勢以
侵漁姦吏舞文而巧詆無宿道向方之志有背公營私
之心法完令具布在方冊而吏情弗虔荒失詔命使元
元之民不被其澤良法美意殆為虛文而監司曾莫之
恤惟以簿書期會為急務蔑視寒士捃摭細故以塞責
而彊禦權勢之吏賊汙貪籍恬不誰何夫監司朕所以

寄耳目之任也失職若此朕何望焉其自今以往各揚厥職按察所部凡姦貪惰慢之吏曠職失守違法害民徇流俗而無奉上之心者悉以名聞當議竄黜以為羣吏之戒其或附下庇姦畏避不舉得於訪聞罪不汝貸故茲詔諭想宜知悉

誠諭士大夫朋黨詔

朕惟唐虞之世臯陶稷契之臣都兪吁咈於廟堂之上更相稱譽而無比周之操百僚師師盡其智能以效官

職庶政惟和萬邦咸寧後世想望而不可跂及朕甚慕
之肆朕纂紹丕圖虛心以治陟降厥士法天地之無私
庶幾振起治功同底于道而執政大臣不能體朕之意
有所薦引任為己功士大夫不明於事君之義者因亦
從而歸之背公營私附下罔上人無賢否進非其門則
極力以排事無是非建非其意則騰口而議茲風不息
浸成朋黨豈社稷之福哉比已簡其尤者投之遠方置
之散地以為讒說殄行震驚朕師者之戒其自今以往

大臣毋以薦引人材銜鬻而市私恩小臣毋以因其薦引阿附而忘公義靖共爾位壞植散羣以聽予一人之作猷其或不悛邦有常刑必罰無赦故茲詔諭想宜知悉

誠諭帥臣修飭邊備詔

朕撫有方夏救寧萬邦蠻夷向風稽首來享蠢茲西戎昏迷不恭敢讐大邦誘逋逃之臣率鯨鯢之旅搔擾疆場虔劉邊陲哀兇鞠頑曠誅積稔神怒人憤勦殄有期

爰命虎臣往行天討惟爾六七帥臣實分閫外之寄為
予爪牙整我六師修飭邊備奉指蹤之畧遵制勝之謨
靈旗西指此誠壯士功名之會也爾其振勵士氣奮張
軍容繕甲兵具卒乘明號令信賞罰同士卒之甘苦習
山川之形勢玩寇掌上視寇目中使戰必勝攻必取日
百里以闢國月三捷以奏功肅清一方掃蕩巢穴流沙
瀚海歸輿地之圖元惡大憝正藁街之戮以攄宿憤大
震天聲時汝之績不其韙歟其或不恭邦有大刑朕不

汝赦故茲詔諭想宜知悉

勸農詔

農天下之本也民之所恃以生也民不務本而事末則其生不遂故先王之政以食為首商人以歲事來辟則戒以稼穡匪懈周人遣諸侯於廟則戒以新畬鉅刈其務農重穀如此用能享豐年之報有積歲之儲教化行習俗美而頌聲興朕甚慕之今朕開千畝之籍行三推之禮躬秉耒耜播種穆之種以給郊廟之粢盛率民敦

本為天下先庶幾四方風動與古匹休朕意厚矣夫承
流宣化推朕德意而致之民者守令之職也其務勸農
教之稼穡省其耕斂勿違其時勿奪其力非須繁逮毋
輒追呼以妨農功使服田力穡享有秋之利衣食滋殖
立太平之基稱朕意焉故茲詔諭想宜知悉

恤刑詔

朕惟昔之治天下者主於德教而以刑弼之刑非所以
先也虞舜好生而民不犯成康刑錯而頌聲興下逮漢

唐盛時亦皆斷獄數百幾致不用朕甚慕之爰自臨御以來制禮以齊民本仁而出政屢降御筆惟刑之恤定笞法減杖數寬節辰原貸之恩嚴桁楊非法之禁庶幾德化感孚刑罰清而民服以追治古之盛而四方典獄之吏未能稱朕欽恤之意情吏慢令而弗虔姦吏舞文而巧詆訊鞠論報掠治傳爰皆有法式莫克遵承依勢作威倚法肆暴公然違戾詔旨使吾民陷于罪罟而未臻刑措之風殆此曹致也自今應刑獄官司敢為暴酷

不如法者在京委尚書刑部在外委提點刑獄按察以聞邦有常刑朕不汝貸故茲詔諭想宜知悉

誠諭守令推行御筆寬恤詔

朕惟祖宗創業守成以仁治天下重熙累洽與古匹休肆朕纂承祇適先烈宵衣旰食勵精為治立政造事所以利安元元者一以寬恤為先屢降御筆手詔播告之修不匿厥旨庶幾仁治克紹祖宗風動四方以成太平之化而比日以來監司守令奉命不虔坐視詔書徒掛

墻壁以為文具廢法慢令恬不加恤夫承流宣化推朕德意志慮而達之民者監司守令之職也失職若此朕何望焉其自今以往各揚乃職應前後頒降寬恤事件竭力遵承毋致違戾使四方萬里之遠實德及民以稱朕意其或不恭守令仰監司監司仰按察互相糾舉以聞邦有常刑朕不汝貸故茲詔諭想宜知悉

誠諭禮官嚴奉祠祭詔

朕嗣有令緒夙夜嚴恭齊明祀事以承上下神示社稷

宗廟罔不祇肅深懼有司不能奉承德意昭格神休屢降詔書不匿厥旨庶幾恪慎精潔副朕明裡恤祀之意而比日以來執事不虔玩習苟簡恬弗加省牲幣禮料取具臨時擯贊跪興不中儀式達于朕聽良用憮然夫祀國之大事也職在禮官委任甚重廢法慢令朕何望焉自今其務所以肅恭自盡稱朕意者敢或不恭邦有常刑朕不汝貸故茲詔諭想宜知悉

誠諭學者辭尚體要詔

朕自臨御以來建學校聯師儒一道德以教養天下之學者屢降詔書崇雅黜浮庶幾文章之盛深醇典正炳然與三代同風而自兩漢以來為不足議也朕之待士至矣比覽貢士程文猥釀不綱氣格卑弱刻意以為高者浮誕恢詭而不協于中騁辭以為辯者支離蔓衍而不根于理文之不振未有甚于此者朕甚羞之豈予大夫平日所以講貫之者未至歟抑偷取臨時務應有司之求而怵於得失歟夫文以意為主以氣為輔以辭彩

為之衛翼本之固者其發為英華必茂源之深者其流
為波瀾必遠予大夫其思所以廓養意氣涵養本源者
博極古今根柢仁義六經之書諸子百家之說必深究
而明辨之則見於文辭者體要兼備宜有可觀者朕有
好爵與爾靡之可不勉歟故茲詔諭想宜知悉

誠諭守令勸課農桑詔

朕惟生民衣食之原莫重於農桑故豳詩陳王業之艱
難孟子言王道之本必以是為先今海內承平之久生齒

日衆一夫不耕或受之飢一婦不蠶或受之寒飢寒切于
肌膚求民興於禮義庶耻而亡為非不可得也肆朕開
千畝之籍行三推之禮躬耕以供粢盛后浴種獻繭親
蠶以為祭服率民敦本為天下先庶幾四方風動與古
匹休朕意厚矣夫承流宣化推朕德意而致之民者守
令之職也其務勸課農桑毋違其時毋奪其力非事須
繁逮毋輒追呼以妨其功崇本抑末使末技游食之民
轉而緣南畝杼軸之女親其蠶織四方萬里之遠男子

畝婦人桑絲身穀腹衣食滋殖蓄積足以備災害而無
飢寒匱乏之患稱朕意焉故茲詔示想宜知悉

梁谿集卷三十六